

# Nairas uras per ina represchentaziun eguala!

*A la supranza, la radunanza generala e las uniuns affiliadas da la Lia Rumantscha ed a l'entira Rumantschia:*

L'onn passà ha la Rumantschia festivà il giubileum da 100 onns da sia Lia Rumantscha e l'onn che vegn festivescha la Svizra il giubileum da 50 onns dal dretg da vuschar da las dunnas\*.

Era sche l'egualità giuridica è arrivada anc in pau pli tard en il Grischun, pudes ins pia pensar ch'ina instituziun sco la Lia Rumantscha haja gi temp avunda per procurar per ina represchentaziun da dunnas adequata en sia interpresa. Surtut sch'ins considerescha che las dunnas èn gia s'engaschadas ditg avant lur egualità politica per la lingua rumantscha. Ma s'abaglia malamain!

Zuar èn pli che 60% da las persunas engaschadas tar la LR dunnas, ma en direzziun e supranza èsi il cuntrari. Là èn 70% da las persunas umens. Dals 10 umens che lavuran tar u per la Lia Rumantscha sesan 7 en las etaschas da schef.

Avant l'elecziun dal nov secretari general han ins uschia udi da pliras varts, ch'ins veglia ina secretaria generala, ina dunna a la testa operativa. I n'ha dentant gidà nagut. L'elecziun dal nov secretari ha mussà che la represchentaziun da las dunnas n'è betg prioritara per la supranza da la Lia Rumantscha.

Pretensiuns sco quella che la cumpetenza vegnia validada pli aut che la schlattaina, u che las dunnas che s'annunzian na possian betg concurrer cun ils umens, vegnan gia dapi decennis duvradas sco stgisis marschas per betg eleger dunnas en posts impurtants. Ellas zuppentan il farg che umens elegian umens, che dunnas egualmain qualifitgadas vegnan resentidas sco inferiuras, mo perquai ch'ellas èn dunnas.

Ina societad vegn furmada da quels che la guidan. Nus lain perquai ina direzziun e supranza che represchenta l'entira Rumantschia. Betg mo las regiuns, betg mo las uniuns, mabain era las dunnas. L'entira Rumantschia.



I na dat nagina raschun per cumplanscher il temp vegl e da favurisar umens envers dunnas. Il cuntrari, igl è temp da laschar a las dunnas la precedenza. Betg empè da lur qualificaziun, betg pervia da lur schlattaina, ma perquai ch'ellas portan qualificaziuns excellentas per ils posts concernents.

Nus pledain per dunnas en ils posts ch'èn dad occupar danovamain. Nus pretendain l'elecziun da dunnas en la supranza e la direzziun fin che umens e dunnas èn resguardads egualmain en las etaschas da schef da la Lia Rumantscha.

E nus lain che spezialmain in post vegn occupà d'ina dunna. Il pli aut e pli visibel post da la Rumantschia: il post da presidi da la Lia Rumantscha, che vegn occupà da nov l'onn che vegn. Questa giada stoi esser ina dunna. Igl è nairas uras!

*Las dunnas rumantschas*

*Viola Cadruvi, Natalia Tuor, Sidonia Pazzeller, Giuanna Beeli, Asa S. Hendry, Ursina Giger, Nadina Derungs, Claudia Cadruvi, Sereina Nay, Edith Albin, Urezza Famos, Cilgia Salzgeber, Marietta Cathomas, Lisa Pfeiffer, Susanna Fanzun, Manuela Balett, Corin Curschellas, Bettina Vital, Rita Cathomas-Bearth, Naomi Arpagaus, Martina Cantieni, Selina Bisaz, Mirella Candreia, Patricia Jacomet, Alice Bertogg, Silvia Bezzola, Gianna Vital-Janett, Margrit Spescha, Flavia Hobi, Jessica Zuan, Chartrina Gaudenz, Mirta Nicolay, Laura Loretz, Yvonne Gienal, Flavia Hendry, Sara-Bigna Janett, Giuanna Caviezel, Lisa Dermont, Maria Cadruvi, Silvia Tschuor, Lucia Parolini, Martina Berther, Barbla Etter, Lisa Schmidt-Candinas, Cinzia Caspar, Annetta Ganzoni, Gianna Olinda Cadonau, Carmen Dedual, Barla Coluccello, Flurina Cavegn, Claudia Knapp, Sara Hermann, Valeria Zangger, Pirmina Caminada, Annatina Dermont, Annatina Nay, Anita Simeon Lutz, Nadja Menig, Laura Decurtins, Pia Valär, Beatrice Baselgia, Chartrina Nicolay, Carmen Pitsch, Samira Malin, Rosita Darms, Tina Vulpi, Fadrina Mischol, Aita Dermont-Stupan, Ursina Haller, Daniela Vital, Frances Bisaz, Letizia Pally, Michèle Caduff, Susanna Mazzetta, Leontina Lergier-Caviezel, Anita Mazzetta, Pia Berther ed ina grupp da collavuraturas da RTR, che ston restar anonimas pervia da directivas publicisticas.*

**\*Nus duvrain qua las furmas um e dunna, ma ans essan pertschertas che quai èn constructs socials e che schlattainas èn en realità blier pli multifaras e betg binaras.**